

Սպիտակում հարգանքի տուրք են մատուցել Ճապոնիայում 2011 թվականի մարտի 11-ի երկրաշարժի զոհերի հիշատակին

12:06, 12.03.2018

Տարածաշրջան: Աշխարհում, Հայաստան

Թեմա: Հասարակություն, Պատահարներ



Հայաստանում ճապոնիայի արտակարգ եւ լիազոր դեսպան Էյջի Թագուչին մարտի 11-ին այցելել է Լոռու մարզի Սպիտակ քաղաք եւ ծաղիկներ դրել 2011 թվականին ճապոնիայում տեղի ունեցած երկրաշարժի զոհերի հիշատակին նվիրված խաչքարին եւ 1988 թվականի Սպիտակի երկրաշարժի զոհերի հիշատակը հավերժացնող հուշակոթողին: Դեսպանին ուղեկցում էին նրա կինը, դիվանագիտական առաքելության աշխատակիցները, Լոռու մարզպետ Արթուր Նալբանդյանը, Սպիտակի քաղաքապետ Գագիկ Սահակյանը, Հայաստանի արտակարգ իրավիճակների փոխնախարար Դավիթ Կարապետյանը, ինչպես նաեւ քաղաքի բնակիչները:

«Ճապոնիայում 2011 թվականի երկրաշարժը մոտ 16 հազար մարդու կյանք է խլել եւ հանգեցրել է եւս մեկ աղետի՝ «Ֆուկուսիմա»

ատոմակայանի պայթյունին: Սակայն ճապոնական կառավարության գրագետ եւ կազմակերպված գործողությունների, ինչպես նաեւ ճապոնական ժողովրդի խիզախության, կարգապահության եւ հայրենասիրության շնորհիվ հնարավոր եղավ կանխել աղետը», - ասել է Սպիտակի քաղաքապետը:

ՀՀ արտակարգ իրավիճակների փոխնախարար Դավիթ Կարապետյանն իր հերթին շեշտել է, որ 2011 թվականի երկրաշարժը ամենահզորն է ճանաչվել ճապոնիայի պատմության մեջ: Համաշխարհային բանկի տվյալներով՝ բնական աղետն ամենազգալի ֆինանսական եւ տնտեսական վնասն է հասցրել պատմության մեջ՝ մոտ 300 միլիարդ դոլարի:

Հայաստանում ճապոնիայի արտակարգ եւ լիազոր դեսպան Էյջի Թագուչին շնորհակալություն հայտնեց Հայաստանի Հանրապետության կառավարությանը, Հայ Առաքելական Եկեղեցուն եւ հայ ժողովրդին ողբերգության օրերին իր ժողովրդին ցուցաբերած բազմակողմանի աջակցության համար: «Առանձին ցանկանում եմ շնորհակալություն հայտնել Սպիտակի քաղաքապետին եւ քաղաքի բնակիչներին, որոնց ջանքերով տեղադրվել է Արեւելյան ճապոնիայում երկրաշարժի զոհերի հիշատակի խաչքարը: Ես ցանկանում եմ շնորհակալություն հայտնել ձեզ ամեն տարի մարտի 11-ին երկրաշարժի զոհերի հիշատակին նվիրված միջոցառումներին մասնակցելու համար», - ասել է դեսպանը:

Լուրեր Հայաստանից - NEWS.am